

# Dxihtsi nin baca'h San Pahblu loh ra' bwiinn Filipos

## *GuelrgahpaDxiohs*

<sup>1</sup> Na'h Pahblu cun Timoteu, naa nu xmooza Jesucristu, ni'chin nin raca'h nu dxihtsi rii' para la'htu bwiinn guihdxyi Filipos nin naa xpwiinn Dxiohs laasii tuhsii gahcaa naa tu cun Jesucristu nee cun neezaa bwiinn ra' nin dzi'baloh loh ra' bwiinn guido' cun bwiinn ra' nin rahcanee la'h ra' bwiinn guido'. <sup>2</sup> La'h Xtaada Dxiohs nu'h cun Xtaada Jesucristu xteenn nu'h guni'hi guelrahcanee cun guelrbwidxyiisto' la'htu.

## *Gudihdxyi-gunaaba Pahblu loh Dxiohs xcweenta ra' xpwiinn Jesucristu*

<sup>3</sup> Guillii-guillii chin riagannasto'n la'htu rudi'hihn guelzuxchiilli la'h Dxiohs nin naa Xtaada Dxiohs nu'h; <sup>4</sup> ya chin rbwiidxyi-rna'ba'hn xcweenta tu loh Dxiohs guillii-guillii rna'ba'hn guelnasaa para la'htu; <sup>5</sup> pwihs i riahxi'hn pur nin cayahcanee tu na'h cagati'chi nu'h xchi'dxyi Dxiohs desde galohpii' hasta la'n dxyih ra' rii'. <sup>6</sup> Ni'chin nin nin na'pahn siguhra la'h Dxiohs zigazii guzo'baloh Ñi'h dzi'n za'ca xteenn Ñi'h lasto' tu, zi'chigahca zuza'loh Ñi'h dzi'n za'ca chi para la'htu hastayii chin gabia'garii Jesucristu stuhbi. <sup>7</sup> Naa bwen cu'cha'y'i hn nee gu'nnahn lligaaba squii' para garaa tu, laasii lasto'n riinnan guelnasaa pur xcweenta tu laasii naa tu tuhsii juunta cun na'h loh guelruntaa'y'i xteenn Dxiohs

nicala na'h nuu'huhn la'n latsidxi'ba o nicala chenee ra'ba na'h loh ra' guxchiisi tin gulu'yi'hn guchii naa xchi'dxyi Dxiohs nin riachiisto' nu'h. <sup>8</sup> Pwihsa Dxiohs naann Ni'h balaaca nin xclaa'dzihna gwa'hahn loh garaatii' tu, pur guelnariin xteenn Jesucristu, <sup>9</sup> nee rdx'i'hna'hn-rna'ba'hn chin rbwiidxihna loh Dxiohs gadzihna gapa tu mahziru guelnadzii'hi lasaa' nee cun mahziru dxiu'nbwa' tu Dxiohs nee tin mahziru za dxiu'nbwa' za tu cuun ra' nin mahzi nallu'hyi para la'htu cohnsaza'ca, <sup>10</sup> tin para gacabwa' tu cwii tu cohnsa nin mahzi lasahca, tin zi'chi guluu'yi gubahan nayaa tu nee ayi chuu nin guluu'yixcwhin la'htu chin gabia'garii Daada Jesucristu; <sup>11</sup> pwihsa la'htu gadzihnee tu tuhbi li'hn roo' nin naa xtsi'n za'ca tu loh Dxiohs nee guunn tu dizi'n za'ca chi cun guelrahcanee xteenn Jesucristu para la'htu nee tin guiñiza'cara' za bwiinn xcweenta Dxiohs loh dxyih jwiisi chi.

### *Na'h nabahanahn pur xcweenta Jesucristu*

<sup>12</sup> Bwiitsi lasaa'ra'n, xclaa'dzihna gacabwa' tu xcweenta cohnsa ra' nin guza'ca'hn, per la'n baria'caa tin mahziru cheezah guidi'chii xchi'dxyi Dxiohs, ayi para ñiñihchilohdxi'hn, sino que mahziru zeezahan hasta la'n dxyih ra' rii'. <sup>13</sup> Garaa bwiinn nin rnabwa' ra' palahsiu, nee cun snuhn ra' bwiinn, naann ra'ba ñe'w'hn la'n lahtsidxi'ba pur xcweenta Jesucristu, <sup>14</sup> ya loh nuu'huhn la'n lahtsidxi'ba, ziahan duxa bwihtsi lasaa' ra' nu'h guyuu'gui'w ra'ba bagaluu'yi ra'ba xchi'dxyi Dxiohs sin nin tuhbi guelnadxyi'bi sino que cun mahzi gaduhbisto' ra'ba pur xcweenta Dxiohs. <sup>15</sup> Guchiin, nuu ra' bwiinn nin rñi'

xcweenta Jesucristu laasii rdxyi'chinee ra'ba  
 na'h nee xclaa'dzi ra' ba gusia'pitii ra'ba bwiinn  
 ra' loon peru snuhn ra' ba ruhnn ra'ban cun  
 gaduhbisto' ra'ba nee cun gaduhbi xigaaba ra'ba.  
<sup>16</sup> Ya bwiinn ra' rii' ruhnn ra'ban pur guelnadzii'hi  
 nin nahpa ra'ba na'h, laasii naann ra'ba Dxiohs  
 bazuh na'h tin gulaaloon xchi'dxyi Ñi'h; <sup>17</sup> peru  
 snuhn ra'ba ruhnn ra'ban pur nin xclaa'dzi ra'ba  
 gacalahsahca ra' ba nezloh ra' bwiinn, nee ayi  
 naa ra' ba bwiinn nanchiipa'h, sino que xclaa'dzi  
 ra'ba chuu'huhn loh guelrzahcacii guroo'ru nnah  
 nin nuu ñie'w'hn rii'. <sup>18</sup> Per ayi xi ruhnn pur  
 dee', ziga caluu'yi garoopa cwa'h ra'ba xchi'dxyi  
 Dxiohs nicala cun lligaaba za'ca o nicala za cun  
 lligaaba dxaaba, ya dee' naa nin raguu'nasaan  
 sto'n, nee cun neezaa mahziru riuu'lehgrasto'n,  
<sup>19</sup> ya ni'chin na'h na'pahn siguhra garaara'  
 dee' guunn para gare'hn lahtsidxi'ba rii' laasii  
 pur nin cabwihdxyi-canaaba tu xcwe'ntahn  
 loh Dxiohs nee cun neezaa guelrahcanee nin  
 nugani'hi Spíritu Saantu Jesucristu na'h. <sup>20</sup> Pwihsa  
 na'pahn siguhra pur xcweenta Dxiohs gacanee  
 Ñi'h na'h ayi gatuhyiloon gu'nnahn nin xclaa'dzi  
 Ñi'h gaca nee guunn nadxiipa za Ñi'h sto'n  
 tin para guiñi'n nezloh garaa ra' bwiinn ra',  
 nee nnah nee cun neezaa para gaduhbitii'  
 chieempa, guluu'yi ra' xcweenta dzi'n za'ca  
 nin gu'nnahn pur xcweenta Jesucristu taantu  
 ziga nabahanahn o taantu ziga za gachi'hn  
<sup>21</sup> laasii para na'h nabahanahn pur Jesucristu,  
 ya sidela na'h gachi'hn nahpaa guzaa'hahn para  
 dxibaa', <sup>22</sup> per sidela na'h guibahanahn, nahpaa

cheza'hn tin gu'nnahn dzi'n za'ca pur xcweenta Dxiohs, ni'chin nin ayi ga'nnahn cuun nin cwiin. <sup>23</sup> Pwihsí nagahn duxa garoopa ra' cohsa ra' rii' para cwiin tuhsin nee na'h garoopahn riu'sto'n; pwihsí neezaa na'h xclaa'dzizahn gachi'hn tin para guzaa'hahn dxibaa' chuu'huhn tuhsí juunta cun Jesucristu, laasii ni'chi naa mahsi mejor para na'h; <sup>24</sup> per para na'h, pur la'htu mahziru xchi'hn baanabahanahn, <sup>25</sup> ni'chin nin na'pahn siguhra ziazahru guibahanahn nee neezaa zia'hanneeruhn la'htu para gacane'hruhn la'htu tin para mahziru chechiisto' tu nee cun neezaa gaaldaa tu guelnasa pur xcweenta xchi'dxyi Dxiohs. <sup>26</sup> Ya zi'chi ba nuudxa'ga gahcahn loh tu, tin mahziru chezah guiñi' za'ca tu xcweenta Jesucristu delaantaloh ra' bwiinn pur xcweenta nin guunn Ñi'h compahñu na'h tin dxie'ltaguia'han cuun tu stuhbi. <sup>27</sup> Ya cun sola garaa si ra' dee' nahpa gulchi'hyii xa guibahan xnehza tu tin zi'chi guluu'yi guchii riachiisto' tu xchi'dxyi cuubi Dxiohs. Zi'chigahca za sidela na'h dxie'ltaguia'hn cuun tu o nicala ayi nuu dxie'l dahns, xclaa'dzihns ga'pahn rsohn dxia'han dzi'tsi tu cun tuhsí lligaaba tin rzuhnee tu pur xcweenta xchi'dxyi Dxiohs nin riachiisto' nu'h, <sup>28</sup> sinque ayi guidxyihbiya' tu xcweenta xiichi'hzi nin guunnee nin rdxyi'chinee la'htu, laasii sidela ayi guidxyihbi tu guluu'yi tu la'h ra' ba ñiichiloh ra'ba per ta'h tu, ya ta'h tu pur nin guta'h Dxiohs la'htu. <sup>29</sup> Pwihsí la'htu, ayi bibwi'hi tu para chechiisidxi'hsto' tu la'h Ñi'h, sino que neezaa bani'hi Ñi'h para sacazii tu pur xcweenta

nin naa tu xpwiinn Ņi'h. <sup>30</sup> La'htu cadxihldxyi tu pur xcweenta xchi'dxyi Dxiohs ziga bwa'haloh tu xa gudxi'lidxih galoh nee neezaa nnah nahpa tu rsohn xa zeeza'hn loh xcweenta dxixi'hw chi.

## 2

*Nahpaa gusagu'dzisto' bwiinn ziga bwi'hnn Jesucristu*

<sup>1</sup> Pwihsidela ralahsasto' lasaa' tu, ziga ralahsasto' Jesucristu la'htu, nee sidela za nuu tu lligaaba tin gacanadzii'hi lasaa' tu, ya sidela dxa'ga lasaa' tu pur Spíritu Saantu nin nuu lasto' tu, o sidela riacaasto' lasaa' tu pur nin nadzii'hi lasaa' tu; <sup>2</sup> sidela zi'chi naa tu pwihsidela gulgasiahxisto'n para tu'pazi pur xcweenta nin guluu'yi garaa tu tuhsimohda ziga ruhnn tu lligaaba, nee neezaa naa tu tuhsiziga nadzii'hi tu Dxiohs, nee laasii tuhsinaa lasto' tu, nee laasii za tuhsinaa lligaaba nin ruhnn tu. <sup>3</sup> Nee ayi guica'ha tu lligaaba nin taa'ha loh lasaa' tu, ayi za guunn nayaachi tu, sino que gaca tu tuhbi bwiinn nado'laa'dzi, tin guunn tu lligaaba mahzi lasahca bwiinn lasaa' tu que no que la'h gahcaa tu. <sup>4</sup> Ayi nin tuhbi bwiinn chi'hyii ba xcweenta xasuuntu si ba, sino que nee nahpaa gacanee ba snuhn ra' bwiinn lasaa' ba. <sup>5</sup> Gulgui'hnn lligaaba zigapa'h nin bwi'hnn Jesucristu. <sup>6</sup> Nicalanaa Ņi'h Dxiohs gahcaa, ayi biaa Ņi'h xcweenta gahca Ņi'h, ziga naa Ņi'h Dxiohs, <sup>7</sup> sino que basaa'n si Ņi'h xquelrnabwa' Ņi'h ya biahca Ņi'h tuhbi moozazi loh Xtaada Ņi'h, ni'chin nin guulaa Ņi'h zigazi tuhbi ndxi'hw, coma ziga la'h gahca nu'h, <sup>8</sup> ya chin

biahca Ñi'h zigazi tuhbi ndxi'hw zi basagu'dzisto' Ñi'h baza'loh Ñi'h garaa nin guhca xigaaba Xtaada Dxiohs Ñi'h. Ya pur garaa nin bazo'badxiahga Ñi'h xchi'dxyi Xtaada Ñi'h guzi'guehlda Ñi'h guhchi Ñi'h, nee nicala xñahxtuhyi ziga guhchi Ñi'h loh tuhbi cruhzi.<sup>9</sup> Ni'chin nin mahzi bwi'hnn lasahca Dxiohs la'h Ñi'h, nee bazo'ba za Xtaada Dxiohs Ñi'h lah Ñi'h nin mahzi lasahca loh garaatii' lah ra' bwiinn nin ca'ha ra'ba, <sup>10</sup> tin chin guluu'yiloh lah Jesucristu, zuzu'hnllihbi ra' garaa ra' nin rii ra' dxibaa', cun loh guihdxyiyuh, nee neezaa nin nuu ra' la'n loh yuh nez loh Ñi'h, <sup>11</sup> ya garaatii' ra' ba dxiu'nbwa' ra'ba Jesucristu nahpa guelrnabwa' tin zi'chi garaatii' ra' bwiinn guiñi' za'ca xcweenta Xtaada Dxiohs nu'h.

*Bwiinn ra' nin riachiisto'ra'ñi'h la'h Dxiohs naa ra' ba bia'ñih loh guihdxyiyuh*

<sup>12</sup> Pur loh taantu, bwiitsi lasaa'ra'n, pwihsí ziga bazo'badxiahga tu xchi'dxyi'hn chin guyuu'huhn lahda ra' tu, zi'chigahca za nnah gulgazo'badxiahga xchi'dxyi'hn mahziru nnah nin nuu'huhn zihtu, nee gulgui'hnn-gulgui'hnn lligaaba nayaa xa guza'loh tu dzi'n za'ca nin guzo'baloh Dxiohs la'n lasto' tu tin ta'h tu loh duhlda. <sup>13</sup> Pwihsí Dxiohs naa nin ruhnbnbiñih lligaaba za'ca sto' tu, tin zi'chi sa'bisto' tu, nee tin gaapaa za tu jweersi guza'loh tu xcweenta dzi'n za'ca chi laasii zi'chi naa xigaaba Ñi'h gaca, laasii zi'chi riu'sto' Ñi'h. <sup>14</sup> Ya gaduhbi cayuhnn tun ayi cwachi tu guelchiah nee ayiza guinaabadxyi'dxyi tu xi para nahpaa guunn tun, <sup>15</sup> tin para nin tuhbi bwiinn ayi guidxeela ra' ba xiilla tuhbi

xtuhlda tu, tin zi'chi gaca tu bwiinn nayaa llii'n Dxiohs loh ra' bwiinn mahlara', bwiinn naxihn ra' ya nezloh ra' ba gaca tu zigazi tuhbi dxih lla'ndxibaa' nin ruzia'ñih loh tuhbi guihdxyiyuh nacahyi. <sup>16</sup> Gulchenee za'ca xchi'dxyi Dxiohs nin runi'hi guelnabahan la'h bwiinn, tin chin gabia'garii Jesucristu, dxiahxi'hn xcweenta tu laasii gacabwa'n ayi guhca'nzahziin nee ayiza bwi'hnna'hn tuhbi dzi'n lliaa'ha. <sup>17</sup> Ya nicala chiinn ra' ba na'h gaca'hn ziga tuhbi guel rgaa'da tin para chioo'hohn yihca guel rgaa'da nin rugaa'da tu la'h Dxiohs pur nin riachiisto' tu la'h Ñi'h, na'h riahxi'hn ya riahxizahn xcweenta garaatii' tu. <sup>18</sup> Gulchuu'lehgra za nee tu, nee gulguica'ha guelalehgra chi xcwee'ntahn.

### *Cayu'nnahn lligaaba cu'neezahn Timoteu*

<sup>19</sup> Ya ziga naan tuhsa cun Daada Jesucristu, cabwe'za'hn gusaa'n Ñi'h tin dxiooba cu'neezahn Timoteu para la'htu, tin mahziru dxiaxisto'hn dxihna'hn xcweenta tu, <sup>20</sup> laasii ayi na'pahn chyuulla stuhbi nin guunn lligaaba ziga na'h nee chuu ba lligaaba xcweenta tu clahru ayi ba. <sup>21</sup> Garaa ra' ba rdx'i'hyii ra' ba xcweenta gahcaa xasuntu ra'ba ya ayi xcweenta dxi'h Jesucristu. <sup>22</sup> Per la'htu banaann tu bwengahcaa naa xmohda Timoteu, ziga nuu nabahannee bi na'h loh xcweenta xchi'dxyi Dxiohs, cayahcanee bi na'h zigazi tuhbi llii'nahn. <sup>23</sup> Pwihsa ni'chi nin cayu'nnahn lligaaba cu'neezahn bi talgu'n si chin gaapasihn rsohn xa zeezah xcweenta xasuuntahn, <sup>24</sup> neezaa na'h cayu'nnzahn lligaaba dxie'ltaguia'hn cuun tu sidela gusaa'n Jesucristu.

*Bagu'nehza Pahblu la'h Epafroditu*

<sup>25</sup> Per nnah bwi'hnnna'hnn lligaaba nahpaa gagu'neezahn la'h bwiitsi nu'h Epafroditu, nin rahcanee na'h cun nin ruti'dxilohnee nu loh trabahjw xcweenta xchi'dxyi Dxiohs, la'hbi nin gulu'nehza tu la'hgahca tu tin guhcanee bi na'h xcweenta tu pur nin rchi'hna'hnn. <sup>26</sup> Ya gagu'neezahn la'hbi laasii xclaa'dzi duxa bi gwa'ha bi cuun garaatii' tu, ya nuu bi guelrzaa' xcweenta tu laasii bihn tu guhcallu'hu bi. <sup>27</sup> Nee guchii guhcallu'hu bi ya mweer ñahchi bi per balahsasto' Dxiohs la'hbi nee ayi la'hsidxi'h bi sino que neezaa na'h, tin para ayi ñuu'ruhn triixta mahziru cun nin nuu'huhn. <sup>28</sup> Ni'chin nin nahpaa gagu'neezahn bi carrih, tin dxiuu'lehgra tu chin gwa'h tu loh bi stuhbi nee tin para ayiza chyu ruhnn xigaaba bi. <sup>29</sup> Gulgaannloh la'hbi cun gaduhbi sto' tu, ziga naa bi bwitsi lasaa' ra'nu'h loh Jesucristu, nee gulgui'hnn lasahca la'h ra' bwiinn nin naa ziga la'hbi, <sup>30</sup> laasii ya mwer ñahchi bi pur bwi'hnn bi xtsi'n Jesucristu, ya ayi biaa bi xquelnabahan bi pur bi' bi xlugahri tu, laasii ayi guhpaa tu chieempa ñi' tu rii' la'htu.

### 3

*Nin guchiipa'h lasahca*

<sup>1</sup> Yannah, bwiitsira'n, gulcuu'lehgra sto' tu xcweenta ziga naa tu tuhsí cun Jesucristu. Par na'h ayi naa nin tuhbi llahn guca'hn stuhbi nin baca'hlahn, laasii la'htu gaapaan xneziuh tu. <sup>2</sup> Gulgahca nasiin cun xcweenta ra' bwiinn nin

rusagui'hi nin ruhnn ziga ruhnn bwehcura', bwi-  
 inn ra' chi nin ruhnn ra' dzi'n dxaaba, ya la'h  
 gahcaa ra'ba nin ruhnn jweersi riuu' tuhbi bwa'  
 tiхи bwiinn ziga guhca costuumbre nin badi'hi  
 Dxiohs guunn ra' bwiinn Israel, tin bwa' chi  
 baluu'yi naa ra'ba xpwiinn Dxiohs,<sup>3</sup> per nnah  
 la'h nu'h naa nu'h xpwiinn Dxiohs pur nin rb-  
 weeza Spíritu Saantu la'n lasto' nu'h ziga sehn  
 nanchipa'h, ayi ziga rluu'yira'dxi'h naa ra'ba xp-  
 wiinn Dxiohs tin naa nu'h nin raann la'h Dxiohs  
 ziga ruluu'yi Spíritu Saantu guidi'hnn nu'h neezaa  
 radi'higuuxta sto' ra' nu'h pur nin bwi'hnn Je-  
 suscristu xcweenta ra'nu'h, ni'chin nin ayi chyu  
 chechiisto' ñi'h bwa' o pur xiilla xcweenta dzi'n  
 za'ca nin ñachidi'hnn ra'nu'h.<sup>4</sup> Nicala nee na'h  
 nahpahn xiilla nin chechiisto'n pur dzi'n za'ca  
 nin bwi'hnnna'hn ya sidela gahbi stuhbi bwiinn  
 nahpa ba xiilla dzi'n za'ca nin riachiisto' ba par  
 ta'h ba loh duhlda na'h mahzi na'pahn para ta'hn  
 loh duhlda<sup>5</sup> laasii chin guulahn xuhnna dxyih  
 nuu'huhn chin baca'h ra'ba bwa' rii' na'h nin naa  
 xsehn ra' bwiinn Israel ziga ruluu'yi naa ra'ba  
 xpwiinn Dxiohs, neezaa naan tuhbi bwiinn Israel,  
 tuhbi bwiinn nin naa xpwiinn guehtu Benjamihn  
 nin guhca llii'n Israel, nee cun naazahn tuhbi bwi-  
 inn nin rñi' xchi'dxyi ra' bwiinn hebreu laasii ga-  
 roopa xcu Zahna'hn rñi' dxyi'dxyi hebreu chi. Ya  
 pur taantu nin bazo'badxiaagahn xlehyi ra' bwi-  
 inn Israel, ni'chin nin guhca'hn xpartihdu ra' bwi-  
 inn fariseu ra' nin mahzi ruzo'badxiahga lehyi  
 chi.<sup>6</sup> Ya de taantu guza'bisto'n xcostuumbre bwi-  
 inn Israel ra', guca'hn na'hla'hn la'h ra' bwiinn  
 nin gule'hesto' ra' ñi'h costuumbre lehyi Moisehs

laasii xinaa gwachiisto' ra'ba xchi'dxyi Daada Jesucristu, ya pur taantu nin bazo'badxiaagahn ziga naa xlehyi Moisehs ayi guyuu' nin tuhbi bwiinn nin ñiñi' xcweenta xtuuldahn. <sup>7</sup> Per nicala garaa ra' dee' nin bwi'hnnna'hn lligaaba lasahca duxa para na'h, per badzihns dxyih nin badi'hihn cweenta naara'n cohsa nin bwi'hnn mahla na'h pur nin biu'nbwa'n la'h Jesucristu ya bata'h Ñi'h na'h loh duhlda. <sup>8</sup> Ya ademahzi de ni'chi ra'ru'nnahn lligaaba ayi xi ballu'yitii' cweenta ra' chi para na'h pur taantu ziahanru nin lasahca biu'nbwa'n la'h Xtaada Jesucristu nu'h, ya pur xcweenta Ñi'h bañiichihns garaa ra' cohsa, ya cohsa ra' chi rgu'bwa'n naara'n zigazii dxihlli ra' nin guyuu'bwihs laasii nnah cun sola nu'nbwa'n Jesucristu lasahca para na'h, <sup>9</sup> laasii xclaa'dzihns chuu'huhn tuhsii cun la'h Ñi'h. Ayi rdxi'hyihns nez hasta canehza gaca'hnn tuhbi bwiinn nin ayi xi xtuhlda ñi'h pur xcweenta lehyi, sino que pur nin riachiisto'n la'h Jesucristu; o sea Dxiohs ruhnn nabahan nayaa'hahn, nabahan za'ca'hn pur xcweenta nin riachiipa'hsto'n la'h Jesucristu. <sup>10</sup> Ni'chin mahzi xclaa'dzihns dxiu'nbwa'n la'h Jesucristu, tin guibahanahn loh jweersiroo' nin bacwa'hn la'h Ñi'h loh guelguhchi nee tin sacazi-ineen la'h Ñi'h loh guelrzacazii nin gudii'dxi Ñi'h, nee tin ayi za dxiaan xquelnabahanahn ziga ayi biaa Ñi'h xquelnabahan Ñi'h chin guhchi Ñi'h, <sup>11</sup> tin zi'chi nicala guti'dxiloon trabahjw duxa loh guidxyiyuh rii' za'pahn siguhra gaaldahn loh guelnabahan nacuubi chin gucwa'hn Dxiohs la'h ra' bwiinnguuchi.

*Xcweenta ziga nahpaa guunn lu'h tin gadzihn lu'h loh mehta nin lasahca*

<sup>12</sup> Ayi xclaa'dzihñ guiñi'n loh tu la'nbidxeela la guelnabahan nacuubi chi, o ya la'n baza'lohtii' la xtsi'n za'ca Dxiohs la'n lasto'n, sino que zeza'hn nez delaanta cun nin cabwe'za'hn tin guidia'han zaldaa guica'hahn prehmiu nin guni'hi Ñi'h na'h, ya pur prehmiu rii' gulii Ñi'h na'h galoh tin biahca'hn tuhbi xpwiinn Ñi'h. <sup>13</sup> Bwiitsira'n, ayi cañi'n na'h gahcaa la'n guhldaalaan; per nin na'paa cayu'nnahn naa na'paa dxia'ldasto'n nin bia'hancah ra' nez diitsihñ; mahs cha'yí chena'hla'hn nin zee ñiidxiuu nez loon, <sup>14</sup> tin gadzihna'hn loh mehta nee tin gu'nnahn gahn prehmiu nin naa guelnabahan nacuubi laasii pur ni'chi gudihdxyi Dxiohs guibahanee nu'h la'h Ñi'h dxiba'a' pur xcweenta tuhsii naa nu'h cun Jesucristu. <sup>15</sup> Ya garaa ra' nu'h ziga rachigubwa' nu'h ya guyuu' bia'ñih loh xigaaba nu'h ziga riachiisto' ra' nu'h la'h Ñi'h, nahpaa guidi'hnn ra' nu'h lligaaba squii' pur cweenta ra' rii'. Ya sidelaa xiilla stuhbi cohsa ruhnn tu lligaaba stuhbi foorma, Dxiohs gahcaa za guluu'yi cweenta ra' chi la'htu. <sup>16</sup> Per nin nahpaa guidi'hnn nu'h sihn; guibahan nu'h tuhsii diacweerdeu cun xcweenta nin ya guhldaa ra' nu'h. <sup>17</sup> Bwiitsi lasaa' ra', gulchezahnee xcweenta ziga ru'nnahn nee gulguia'hadzi'tsi la'h ra' nin nabahan tuhsii diacweerdeu cun xcweenta nin zozahnee nu'h. <sup>18</sup> Pwihsí ziahanla bweelta guñi'n, per nicala nnah cun ñihsabwii nin riaaba loon cañi'n stuhbi, nuu ra' ziahan bwiinn nin rii nabahan nnah nabahanee ra'ba xcweentazi ra' ba ya zi'chi ruluu'yi ziga naa ra'ba bwiinn nin

rbwe'hesto' ziga guhchi Jesucristu pur xcweenta ra' bwiinn guidxyiyuh. <sup>19</sup> Per xfihn ra' ba naa gabihldxyi, laasii cun sola ruzo'badxiahga ra'ba nin xclaa'dzi tihx ra'ba ya ruhnn nayaachi ra'ba xlawaahha nin gutuhyiloh ra' ba pur cohssax-ihn nin ruhnn ra' ba, laasii cohss guidxyiyuh rza'bisto' ra' ba ya xcweenta Dxiohs rbwe'caa ra' ba, <sup>20</sup> per ya ziga la'hra'nu'h lahdxyi ra'nu'h naa nez dxibaa' nee dxyubweeza ra'nu'h nez dxibaa' guitahntee Daada nin guta'h la'hnu'h nin naa Daada Jesucristu xteenn nu'h. <sup>21</sup> Ya la'hñi'h gucha'h ñi'h bwe'lthxi probilaasa ra'nu'h tin gacan zigazi bwe'lthxi nabahandzi'tsi ñi'h, ya guunn ñi'h zi'chi pur xcweenta guelrnabwa' nin nahpaa ñi'h tin guunnan para guinabwa' ñi'h garaa ra' cohss.

## 4

### *Guldxiyahxi par tu'pazi pur xcweenta Daada Dxiohs*

<sup>1</sup> Pwihs pur ni'chin bwiitsi lasaa'ra'n, nin xclaa'dzihh gwa'hn loh ra' ñi'h; la'htu nin nadzii'hira'n, nin riahxi'hn xcweenta ra'ñi'h nee cun naa za tu tuhbi prehmiu xte'nnahn, gulchezah dzi'tsi pur xcweenta ziga nin riachiisto' tu xchi'dxyi Daada Jesucristu, nee <sup>2</sup> rdx'i'hna'hn loh Evodia cun loh Síntique, cwiih ra'bi tuhsdi diacweerdu zigazi bwehldaadzi'tsi ra'bi xcweenta lah Daada Jesucristu, <sup>3</sup> ya yi'h xcompañeeru'hn nanchiin nin ridi'hnnee dzi'n, rna'ba'hn loh lu'h gacanee lu'h la'h ra' bizaa'n ra'nu'h laasii la'hra'bi guhcanee ra'bi na'h

bidi'chii xchi'dxyi Dxiohs tuhsí juunta cun Clemente cun spaalda ra' nin guhcanee na'h. Lah ra'bi ya naala'n puunta loh dxihtsi nin naa guelnabahan nacuubi.

<sup>4</sup> Guldxiahxi tuhpa'zi xcweenta tuhsí naa nu'h cun Daada Jesucristu; rna'ba'hn loh tu jguldxiahxi par tuhpa'zi!, <sup>5</sup> tin garaa ra' bwiinn dxiu'nbwa' ra' ba la'htu zigazi nahpaa tu paseensi, laasii la'h Daada Jesucristu ya mwehrla guibia'garii loh guidxyiyuh stuhbi, <sup>6</sup> nee ayi chuu tu guelrzaa' pur xiilla cohsa, sino que chin rbwihdxi-rnaaba tu loh Dxiohs gulchi'hn gulguinaaba loh Ñi'h xcweenta cohsa ra' chi, nee gulgadi'hi za guelzuxchiilli la'h Ñi'h <sup>7</sup> ya tin la'h Ñi'h gusacwahchidxyii Ñi'h sto' tu ya cun guelnaga'l diuh chi dxiinn tun per ayi gacabwa' tu xcweenta guelnasaaroo nin nahpan ya la'h Ñi'h gaapa Ñi'h lasto' tu cun xigaaba tu pur naa tu tuhsí cun Jesucristu.

*Gulgui'hn lligaaba xcweenta garaatii' ra' nin naa bwen*

<sup>8</sup> Pur luulchima bwiitsi lasaa' ra', gulgui'hnn lligaaba xcweenta garaa ra' nin naa ra' guchii, loh garaa ra' nin cha'yí, loh garaa ra' nin naa xnehza, loh garaa ra' nin naa ganaalla nayaan nee gulgui'hnn lligaaba loh garaa ra' nin naa bwen nee loh garaa ra' nin rñi' za'ca ra' bwiinn xcweenta ñi'h cun garaa ra' nin ruhn tucahri ziga xmohda bwiinn cun nin mahzi dzi'baloh loh garaatii'. <sup>9</sup> Gulgasi'dxi nin baluu'yi'hn la'htu nee cun xcweenta nin guca'ha tu, cun garaa ra' nin bihn tu guñi'n cun garaa za ra' nin bwa'h tu

bwi'hnna'hnn. Gulgui'hnnzan zi'chi, ya Dxiohs nin rusacwahchidxyii sto' bwiinn chuunee la'htu.

*Guelrgaa'da nin badi'hi ra' bwiinn filipenses la'h  
Pahblu*

<sup>10</sup> Riahxiduxa'hnn xcweenta nin naa nu'h tuhsí cun Daada Jesucristu pur nin gubia'garii bagannasto' tu na'h bwi'hnn tu cumpahñu na'h. Na'nnahn dez galoh guyuu'pa'h tu lligaaba ñahcanee tu na'h per ayi guhpa tu lugahri. <sup>11</sup> Ayi cañi'n laasii pur cachi'hna'hnn, pwihsí na'h rahca rbahchidxyiisto'n cun cuunchi'hzi nin na'pahn. <sup>12</sup> Na'nnahn xa guibahanahn loh guelprohbi, neezaa xa guibahanahn loh guelnaza'ca, nee la'n na'nnzahn xa guti'dxiloon xiichi'hzi, nicala loh guelrchia'hnn nee nicalaza gadxahsto'n, nee nicala tiidxisurruu ziahan nin ga'pahn o nicala ayi xi ga'paatii'zahn. <sup>13</sup> Loh garaatii' ra' dee' za'ca guti'dxilohra'ñin laasii la'h Jesucristu naa guelnada'n xte'nnahn. <sup>14</sup> Pwihsí bwen gahcaa bwi'hnn tu na'h gudxi'zi tu xcweenta ziga caza'ca'hnn. <sup>15</sup> Ya la'h gahcaa tu naann tu chin babii'hihn loh guihdxyi hasta rii tu caa, chin guzohbaloh balu'yi'hn xchi'dxyi Dxiohs loh tu, la'hdxi'h tu ziga naa tu bwiinn guido' xteenn Filipos, la'hdxi'h tu naa tu nin gulu'nehza ra' tuhbi guelrgaa'da para na'h pur xcweenta xchi'dxyi Dxiohs nin guñi'n loh tu. <sup>16</sup> Pwihsí neezaa chin guyuu'huhn guihdxyi Tesalónica, gulu'nehza za tu tuhbi-chiohpwi'hn guelargaa'da para na'h nin bichi'hna'hnn ri'chi. <sup>17</sup> Nee na'h ayi nuu'huhn lligaaba si nin guica'hahn xixteenn tu; nin xclaa'dzihn gaca para la'htu gadzihn

guica'haru tu xcweenta nin lasahca xcweenta tu nez delaanta loh Dxiohs. <sup>18</sup> Pwihsí na'h la'n guca'ha garaatii', ya hasta cadii'dxisuu ru para na'h cun nin gulu'nehzanee tu la'h Epafroditu, cun ni'chi la'chin para na'h. Nin gulu'nehza tu para na'h naan zigazi tuhbi guhn nin xchia' nahxi nin nallu'hyi duxa nezloh Dxiohs. <sup>19</sup> Pwihsí, Xchiohs gahcaa nu'h guluu'yi garaa ra' nin dxia'dxi para la'htu laasii ziroo' duxa nin nahpaacha'yi Ñi'h xcweenta Jesucristu. <sup>20</sup> ¡Gloria gadi'hi nu'h la'h Xtaada Dxiohs nu'h para tu'pazi! Pwihsí zi'chi gaca.

### *Luulchima guelrgahpaDxiohs*

<sup>21</sup> GulgahpaDxiohs xcwee'ntahn la'h ra' garaatii' ra' nin riachiisto' ra' ñi'h xchi'dxyi Dxiohs, pur xcweenta tuhsí naa nu'h loh Jesucristu, ya bwiitsi lasaa' ra' nu'h nin nuunee na'h rii' rgu'nehza za ra'ba tuhbi guelrgahpaDxiohs para la'htu. <sup>22</sup> Neezaa nin riachiisto' ra' ñi'h xchi'dxyi Dxiohs rxe'hla ra'ba tuhbi guelrgahpaDxiohs para la'htu, nee bwiinn ra' nin ruhnn ra' dzi'n loh Emperador Romanu mahzi ru rgu'nehza za ra' ba tuhbi guelrgahpaDxiohs para la'h tu. <sup>23</sup> Dxiohs guntaa'yi yihca garaatii' tu. Zi'chi gaca pwihsí.

**Xchi'dxyi cuubi dxiohs nin bie'galuu'yi daada  
Jesucristu (El Nuevo Testamento en el  
zapoteco de Chichicapan y en español)  
New Testament in Zapotec, Chichicapan  
(MX:zpv:Zapotec, Chichicapan)**

copyright © 1990 Wycliffe Bible Translators, Inc.

Language: Zapotec, Chichicapan

Translation by: Wycliffe Bible Translators, Inc.

Zapoteco, Chichicapan [zpv], Mexico

**Copyright Information**

© 1990, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Chichicapan

**© 1990, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

f751ae13-0cd1-54fd-8c16-86718fb9cd5b